



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 6

Yangia anidakangma :

f Tir Yimym

ig tiryimym@aolima

yt tir yimym

TAPAK 3

Assam CM anema FIR
2 benokogo

Mongolbarnü NDA senden nung
party 38 adentsü: JP Nadda



VOL. XX NO. 275 (ADOK 275)

DIMAPUR SANGTENNÜ (TUESDAY)

CHITENI (JULY) 18, 2023

₹ 5.00

Dimapur-Kohima NH-29 lenmang lapoker

Dimapur, July 17, 2023 (TYO): July 18, 2023 nungi tatemzükba kar dena Dimapur-Kohima tsüngda NH-29 lenmang lapoktsütsü ta Chümoukedima Deputy Commissioner Abhinav Shivam, IAS-i Hombarnü metetdaksüogo.

Anepdang 5:00 ako nungi nikongdang 6:00 ako tashi light passenger vehicles atema lenmang lapoktsütsü saka iba lenmang nung senzürtemi tamasa Traffic Police den sign süteptsüla.

Dimapur-Kohima tsüngda lenmang nung lendong ajurutsü meteta lir aser pei nijai tebilemstü khuret abener ta senzüsönongertemi tenangzükba ka nung sign asütsü.

Iba lenmang nung traffic ajemdaksütsü atema Patkai Bridge aser Jharnapani tsüngda

passenger vehicles terara dang senzüdaksütsü ta Chümoukedima DC-i sangdong nung shia lir.

Iba lenmang nung medical emergencies, air mesüra railways ajanga aini aotsüpurtem aser sorkar ketdangsür garitem kuli repranger senzüdaksütsü, ta paisa ashi.

Lenmang yanglurtemi temalen nungi lung kaktoka endokdang mesüra safety measure mapa inyakkdang lenmang shibangtsü. Maneni, tzünglu kanga arudang lenmang ajunga shibangtsü aser tzünglu anenba sülen ang lapoktsü. Anungji iba lenmang nung senzürtemi NSDMA ajanga tsüngsang-mopung osang sangdongba meteta alitsüla, ta Chümoukedima DC-isa metetdaksüogo.

Manipur nung Maring Naga tsür ka tepsetba aitsür: NSF

Dimapur, July 17, 2023 (TYO): Manipur nung Arambai Tenggol teloki Meira Paibi tem den yaritepa Maring Naga tsür M Lucy Marem tepsetba atema temulung raksar ta Naga Students' Federation (NSF)-i metetdaksüogo.

Lucy-i la Maring Naga tsür ta shiaka ozü tetsü tajung ka dang taochi mesayui tepsetba aitsür asr iba ya Naga nung aser talisa Maring Naga nung anema inyakba mapa ka ta züngshir, ta NSF-i sangdong ka nung ashi.

Arambai Tenggol aser Meira Paibi temi iba tesempatsü mapa ya kechiba inyak ta onoki asüngdang. Tai maketba tetsür ka tepsetba ajanga parnokki Manipur nung kin

anema tasa jungjunga atonger inyakba kuli agütsür, ta parnokki ashi.

United Naga Council aser tanga Naga teloktemi akhangba ama Lucy tepsetertem pua ozüng tapet agi merenshitsu akhanger, ta NSF-isa metetdaksüogo.

Manipur nung tanü ozüng mali ama tensa ajuruba ya tang sorkar yimsü asürtem ajanga lir aser parnokki tebilemstü khuret abentsü ta NSF-i ashi.

Naga nung kolensa lidir liaka yimjung meimertem lir ajisüaka onok dak nokinketer azü lir anungji onok anema mapa inyakra onokia noktaksü. Tangatetba tamajung bener ozü koulak nung danga kongshira onoki magizüksü ta NSF-isa ashi.

Assam nung 'Deputy Commissioner' nungi 'District Commissioner' melener

Guwahati, July 17, 2023 (Agencies): Assam sorkari "Deputy Commissioner" nungi "District Commissioner" ta nungja melenshiogo.

Ketdangsübaren tajungba akümtsü aser public service tajungba asütsü atema Assam Governor-i 'Deputy Commissioner' nungi 'District Commissioner' ta melenba osang metetdaksü.

May 19 nü state cabinet senden ka amendang Deputy Commissioner (DC) nungi District Commissioner (DC) ta nungja melentsü jembiba sülen Governor-i iba tetuyuba agütsüogo.

'DC' ta asüba abbreviation kasa dang asütsü saka tang nungi tebilemstü khuret teimba asütsü, ta Minister Pijush Hazarika-i ashi.

Iba temelenshi ajanga DC kati pei mapa lemezükba district nung 4th aser 3rd grade mapa dena gazetted aser non-gazetted officers mapa melenshitsu tashi angutsü. Ajisüaka gazetted officers mapa melentsü atema bangdak guardian minister nungi temelaba agitsüla.

Iba temelenshi asüba sülen taoba mapang Divisional Commissioner indang office nung tashitem General Administrative Department nung Principal Secretary dangi aotsü.

NPF-i July 4 lendong bushisüngdangtsü akhanger

Dimapur, July 17, 2023 (TYO): Naga People's Front (NPF)-i state sorkar dang July 4 nü Dimapur-Kohima NH-29 tsüngda New Chumoukedima nung lendong atalokba atema inquiry committee ka tetettsü ayongzükogo.

Iba lendong atema National Highways Infrastructure Development Corporation Limited (NHIDCL) mesüra contractor merenshitsu ta NPF-i ashi.

Iba lendong atema tekaratiba nung temeten magütsüra NPF-i "public court" dangi contractor aser NHIDCL abentsü ta NPF Legislature Party leader Kuzholuzo (Azo) Nienu-i

sangdong ka nung ashi.

"Dimapur-Kohima NH-29 4-lane atema aika jembiogo saka July 4 lendong sülen-a NHIDCL-i teinyaktsü mapa meinyaker mesüra public taküm kümzükba ayutsü tenangzükba magütsür" ta pai ashi.

July 4 lendong matalokdang Nagaland Pollution Control Board-i NHIDCL dang aiben safety measures aser environmental destruction atema temepishiba agütsüogo saka NHIDCL-i itemji mangashii dang toktsü aser alima lendong dak dang tai tongloktsü, ta Nienu-isa ashi.

"State sorkari lenmang tesem kar nung tetsürtem aser volunteers-i anogo piyong gari senzüba mita reprang.

Tanü mezüng anogo mokdangdang lendong kecha mataloki tiptema süiogo, ta CoTU nung General Secretary, Lamminlun Singsit-i ashi.

"Manipur Chief Minister N. Biren Singh-i lendenlen aliba teloktemaser Meira Paibi temi anir telok balala azüoktsü ta nangzükba Kuki-Zo lisopur tesemtem nung injang khaloktsüba, amakba aser nisung tepsetba manener" ta Singsit-isa ashi.

Meira Paibi temi anir lendenlen teloktemi rara manener aser parnokki Manipur nung yimjung aser tensa süngjemdaksütsü anema noktaker ta paisa ashi.

National Highway-2 nung

yanglutsü ali peria magütsü ta

NHIDCL-i ashir saka kecha masüba nisung katia lungren shitak metutokba nung lendong lir ta angateta lir" ta paisa shisem.

NHIDCL-i dynamite amshia poksaba aser ali atuba yimya tai ta state sorkari ashibaji kanga shitak, ta Neinu-isa metetdaksü.

"NHIDCL-i mapa shitak meinyak ser alima lendong dak tai tonglokja Naga nung kälakoktsütsü meranger. NHIDCL-i safety measures inyaktsüla kechiyong lung aika anenzüka alutsüsa lir aser tanü tashi lung tsükba manener anungji ano lendong tulu ajurutsü ana nung dang lir" ta NPF lennirisa ashi.

CoTU-i Kangpokpi district ghonda 72 mokdang

Dimapur, July 17, 2023 (Agencies): Committee on Tribal Unity Sadar Hills (CoTU)-i July 16 ayaterm nungi Kangpokpi district nung ajunga mokdang.

M/S Misao Gas Service indang truck gari asem rongdoktsüba aser Kangpokpi district tezülen Kuki-Zo yimtsingtem maneni amakba anema CoTU-i ghonda 72 mokdangtsü ayongzük.

Tanü Kangpokpi district ajungalen dokan, shishilembabaren, shisaliok rejutem aser sorkar office ajak shibanga liasü. Külen National Highway-2 nunga CoTU-i temelaba agütsüba garitem dak alaka tanga gari ka danga mesenzü.

National Highway-2 nung

telem kar nung tetsürtem aser volunteers-i anogo piyong gari senzüba mita reprang.

Tanü mezüng anogo mokdangdang lendong kecha mataloki tiptema süiogo, ta CoTU nung General Secretary, Lamminlun Singsit-i ashi.

"Manipur Chief Minister N. Biren Singh-i lendenlen aliba teloktemaser Meira Paibi temi anir telok balala azüoktsü ta nangzükba Kuki-Zo lisopur tesemtem nung injang khaloktsüba, amakba aser nisung tepsetba manener" ta Singsit-isa ashi.

Meira Paibi temi anir lendenlen teloktemi rara manener aser parnokki Manipur nung yimjung aser tensa süngjemdaksütsü anema noktaker ta paisa ashi.

Kuki village defence volunteers-i Meitei nung tesem nung parnok telok aser Myanmar nung amenoka aliba Meitei telungpurtem ka danga metepset. Kuki nung alidak ang nisung ka tepset aser iba ajanga Kuki-Zo nungeri onok amaki arurtem den dang raratepba sayur, ta Singsit-isa metetdaksü.

Kangpokpi district temeket nung Centre sorkari mapang shitak nung Central forces, Army aser Assam Rifles mapa lemezüksüba atema pelar ta paisa ashi.

Ano, Centre sorkari July 26 nungi UPF aser KNO den Kuki-Zo yimten ken o jembi tenzüksü aliba atema tenüngsang agütsür, ta Singsit-isa shisem.

Kohima anentsüh lendong nung nisung 1 asü, 1 yiru



Kohima, July 17, 2023 (TYO): Hombarnü Kohima kübok Meriema yimtsüng nung anentsüh lendong ka nung nisung ka asü aser ka yirua mozü kidang anepaludar.

Iba lendong ya Meriema nung nija ki yangludak ka nung atalok. Ali atur nisung ana anentsüh agi anenbangdang ka asü aser ka yirur mozü kidangi anir ao.

Tesüiba anogo ishika Kohima nung tzünglu kanga aruba ajanga

Kohima kübok tesem aika nung anentsüh aluogo.

Khouchiezu colony, T Khel Model village nung culvert ka anenzüka bener ao aser iba ajanga lenmang shibang.

Ano, Sector-8 Kitsubozou, Ward No. 5 nunga anentsüh aluba ajanga tetsüng lenmang raksatsü saka iba tesem nung alirtemi ali okdoker lenmang ka lapokogo. Maneni Lower Paramedical colony nunga anentsüh tulu ka

alua gari lenmang anenbang.

9-Kohima Town Assembly Constituency MLA Dr Tseihhoutuo Rhutso-i iba anentsüh aluba tesem semdang aser colony nung alirtem nem tools aser machinery teyari agütsü ta osang angazüker.

Mon nung anentsüh alu

Külen, Mon district nunga Mon village lenjem aser Yaling tsüngda National Highway (NH) 702 anenoka iogo.

"Tzünglu kanga aruba ajanga July 15 nü NH-702 nung kilometer 1 shi raksaogo aser tesem aika anenoka ai" ta Mon Deputy Commissioner Ajit Kumar Verma-i ashi.

Iba ajanga Mon Village lenjem aser Yaling tesem tsüngda NH-702 shibangogo anungji gari tilatem ajak Mon Village by-pass road ajanga senzüsütsü metetdaksür, ta pai ashi.

Tzünglu kanga aruba agi Mon district kübok tesem aika nung anentsüh aser lung anenzüka aluba ajanga lenmangtem den kiojen aika raksaogo ta DC Verma-isa ashi.

Dimapur Airport nung Disability Awareness & Sensitivity Workshop agi



Dimapur, Chiteni/July 17 (TYO): Office of the State Commissioner for Persons with Disabilities, Nagaland ajanga Dimapur Airport nung Airport/Airlines Staff aser Security Personnel atema Disability Awareness & Sensitivity Workshop ka July 14, 2023 nü agia liasü.

Matamabensar tem senzüba mapang timtem ajuruba aser parnokü nüngdakba angatettsü asoshi shisatsü agütsütsü aser mata-mabensar dang meimtsü, maongka kasa agütsütsü aser akumtsüboamshitsü sayutsü nükjidong nung iba workshop ya ayongzüka liasü.

Iba sentong nung Disability Commissioner Diethono Nakhro-i jembidang, alima nung nütsüng yongsük shilem 16 mesüra nisung trok nung ka matamabensar lir ta WHO data ajanga sayur, ta ashi.

Tangbo tourist ama, mapa atema aser kazüa senzütsü atema aser yamaji kuli balala asoshi matamabensar tali senzüsemponger, anungji itemji angatettsü asoshi training tem

kanga tongtipang lir, kechiaser awareness maliba mesüra matamabensartemi nüngdakba mangatetba ajanga senzüsemponger matamabensar aser ketdangsür temi timtem ajurur, ta lai ashi.

Kodang tangatetep lidir, ajak asoshi inyakim ajanga shidak nung aotsü, ta lai ashi.

Iba workshop nung Rights of Persons with Disabilities Act 2016 tali tejangjaba angatetdaksü, matamabensaba tabu balala, teyari oset amshiyim, matamabensar tem den jembishinüadang inyaksü-meinyaksü yimyattem sayua liasü.

Matamabensar asoshi metzü meshiba tesem junga anepalutsü nüngdakba, matamabensar indang gari anentsü tesem aser parnok yutsütsü aser anir aotsü tesem Dimapur Airport nung tang nüngdakba indang jembia liasü.

Matamabensar passenger tem ketdangsüba mapang tayongzüka balala ajangshiba indang CISF, Indigo aser Air India nungi teshimtet nisungtemi

iba sentong nung lemsatepa liasü.

Geetha Sahu, APD AAI ajanga workshop nung shilem agir ajak pela agizük aser matamabensar passenger tem yariba mapang service tajungba agütsütsü asoshi staff tem nem awareness agütsüba asoshi mera balala agiba atema pelaba lemsatepa liasü.

Paul P. Chasie, CASO ASG Dimapur ajanga melepzüng o jembidang, matamabensartem senzüsempong dang, talisa security screening mapang tajangshiba tajung alitsü asoshi iba ama sentong ya kanga nüngdaka liasü, ta ashi.

Iba sentong nung timtem balala benoka lemsatepa awareness agütsüba ajanga ketdangsür temi matamabensar senzüsempongba mapang service tajungba agütsütsü imlar, ta pai ashi.

Iba sentong nung Indigo nungi Yile Haikam menden liasü, kong Nagaland State Disability Forum (NSDF) tir Kevingunu Fatima Kera dena liasü.

Longleng nung Office Procedures and Accounts training agütsür

Dimapur, Chiteni/July 17 (TYO): Office Assistants tem asoshi Office Procedures and Accounts indang training ka VDB Hall, Longleng nung July 17, 2023 nü tenzüko.

Iba training ya July 21, 2023 nü tembangtsü. Dr. Alem Longchar, Assistant Director, ATI ajanga iba training indang tongmelang agi rateta ashi, koba anogo pongu nung agitsü.

Iba training nung adenba sorkar mapa inyaker tem ajangzüksü asoshi topics aika inoka lir, ta pai ashi.

Pai training agirtem dang

shisalen sayur aser parnok tsünga jembishinüa mejangjai alibatem jangjateptsü ajungshia liasü.

Iba training nung shisalen sayurtem ya Andreas Lotha, NSS Under Secretary Economics and Statistics; Khinyi Woch, Sr. Account Officer (Rtd) aser Hongching Phom, Sr. Account Assistant, Sub Treasury Office, Longleng alitsü.

Iba training nungya item onüktem awajemtsü: (1) The Nagaland Government Servant Conduct Rules, 1968 (2) The

Nagaland Services Discipline & Appeal Rules, 1967 (3) General Conditions of Service (4) Pay and Allowances & Fixation of Pay (5) File Management (6) e - Pay Bill & e -NPS (7) Traveling Allowance Rules (8) Noting & Drafting Skills (9) Pension Rules (10) Forms of Communication (11) Maintenance of Service Book, APAR & MACP (12) Leave Rules (13) Confirmation of Service and (14) Promotion & Seniority.

Iba training mezüng anogo nung nisung 54 dena liasü.



July 15, 2023 nü Lemsachenlok aser Akhoya Shisaluyimer Telongjem na longjemer CTN-Longleng lenmang nung Dikhu nungi Changtongya tashi süngdong tapu balala tema aoba mapang agiba noksa ka yangi angur. Iba sentong nung Lemsachenlok telok nung lenir Y.Nüklu Phom dena liasü. Lemsachenlok teloki Longleng-Tuensang lenmang lena süng tapu balala temtsüogo.

NH-702 nung gari senzüba nokdanga atar

Dimapur, Chiteni/July 17 (TYO): Tzünglu kanga sashia aruba aser tzüngsang majungba ajanga anentsüh, molushi aser long mekazüka alua lenmang nokdanga aser raksaba mechi aser tawa Mon village junction aser Yaling area tsünga NH-702 raksaba ajanga iba lenmang ya tarutsü nung totuyuba ka magütsü tashi gari senzüba nokdanga atar, ta Deputy Commissioner, Mon, Ajit Kumar Verma, IAS ajanga sangdong

ka nung ashi. Anungji NH-702 ajanga senzüba light motor vehicle ajak Mon Village By-Pass lenmang ajanga senzütsü metetdaksür. Ajisüaka iba lenmang ya majung asünung, heavy vehicles (Commercial aser Passenger) ajak dang tarutsü nung totuyuba ka magütsü tashi iba By-Pass lenmang nung mejajai atatsü metetdaksür, ta sangdong ajangasa ashi.

WENN-i Mkg nung tetsür shishilembartem atema shisatokden ka katsü

Mokokchung, July 17 (TYO): 17th July, 2023 nü Mokokchung Deputy Commissioner senden kilem nung Women's Entrepreneur Network Nagaland (WENN) teloki Mokokchung nung tetsür shishilembartem atema shisatokden sentong ka ayongzüka katsüogo.

Iba shisatokden ya tongtibangsa tetsür shishilembartem nem shishilembaba luyim tsütsü lenmang balala sayutsü asoshi liasü. WENN yagi tetsür shishilembaba tsütsü ajungkettsütsü asoshi mapatem inyaker. WENN nung tetsür shishilemba mashi kati züngsemettsü akok.

Iba sentong nung Mokokchung Deputy Commissioner, Tsüvisie Phoiji NCS-i jembidang, WENN teloki Mokokchung arua iba ama shishilembaba tsütsü sentong tajung ayonga ajungshiba asoshi pelaba lemsatep.

Kohima ji Nagaland yimtiba lir aser Dimapur ji Nagaland asoshi shishilemba dak mongjen ka lir, anungji, iba ama yimti nungbo tetsür shishilemba aika lir, yamaji, Mokokchung nunga shishilembaba maparen renloksü lenmang lir, ta pai ashi. Paisa iba dak sentakba nung ashidang, Mokokchung ya mezüngpur district ka ta ajaki jembir, anungji, maongkaji lir aser business tenzüksü atema mapatong nungdakba kar lemsatep.

Business koba südir süaka, tilaka nungi tuluba kümdakja Mokokchung nung dang merangloki kidanger district tatishitsü agi; Zunheboto, Wokha, Tuensang, Noklak, Shamtor, Longleng aser Mon tashi atsünglana otettsüa inyaksüla, ta paisa ajungshia liasü.

Iba shisatokden sentong nung Watsü Mungdang ketdangsür kar den tetsür shishilemartem parnok 40 shi aden. Iba sentong nung SBI ajanga shisatsü metangba nung yaritep.

Kohima DPDB senden menogo

Dimapur, Chiteni/July 17 (TYO): District Planning & Development Board (DPDB), Kohima ita shia amenba senden July ita asoshi DPDB indang Conference Hall, Kohima nung July 17, 2023 nü mena liasü.

Iba senden ya Deputy Commissioner aser Vice Chairman, DPDB Kohima District, Shanavas C IAS lenisüba kübok amen, kong district nungi elected members Advisor School Education, SCERT, Dr. Kekhrielhoulie Yhome, MLA Kevipodi Sophie aser MLA Dr. Tseilhoutuo Rhütso nungera dena liasü.

Taoba senden nung lemtetba tem lepa reprangshiba sülen parnokü society registration indang onük benoka jembia aser Elevate Foundation, Tekhuliesha, Secretariat Road, Kohima ya nüngdakba mera agitsü atema sorkar dangi yok, saka Tamlu Bühü Union, New Secretariat Road, below NBCC Convention Centre, Kohima indang taruba senden nung jembitsü lemtet.

'Sahkar Se Samridhi' - Development of the National Cooperative Database (NCD) dak sendakba nung Rokovisa Chasa, DRCS Cooperation ajanga National Scenario aser State Scenario indang lemsatepa liasü.

National Scenario kübok cooperative lakh 8.50 zülüoka lir aser yangji credit cooperative

as er non-credit cooperatives tem lir, ta pai metetdaksü.

State Scenario kübok cooperatives 8877 zülüoka lir aser item nungi Kohima district nung society 1541 lir, ta ashi.

Paisa State Level Apex Cooperative Federation, Training & Education aser district nung maparen balala inyakba indanga lemsatepa liasü. Pai züngsemtem dang National Cooperative Database nüngdaker, ta ashi.

E.E Power, Er. Shiludi Longkumer-i Standalone Pre-Paid Meter indang presentation ka agütsüba mapang, district nung power customer 54,000 dak tema aliba nungi pre-paid customer 940 lir, ta metetdaksü.

Board ajanga iba ken o tatsü-talang jembia aser pre-paid system amshiba nung tajangzüka aliba indang awareness tali agütsütsü nüngdaker ta lemsatepa liasü.

Senior Technical Director & DIO, NIC, Kohima, J.G. Lorin Rengma ajanga lokti dang July 25-31, 2023 anogotem agitsü aliba Digital India Week indang metetdaksü aser züngsem ajanga dang district website nung nüngdakba mera agitsü asoshi pei sasa register asütsü ayongzüka.

Taruba DPDB senden nung Kohima Municipal Council (KMC) dang par department inyakim osang agütsütsü nungloksü.



July 17, 2023 nü Gandhinagar nung G20 Finance Ministers & Central Bank Governors senden aliba mapang Union Finance Minister Nirmala Sitharaman, IMF Managing Director Kristalina Georgieva, Canada Finance Minister Chrystia Freeland, First Deputy Managing Director of IMF Gita Gopinath, United States Treasury Secretary Janet Yellen aser Indonesia Finance Minister, Sri Mulyani nunger tangokba noksa nung angur.

Mongolbarnü NDA senden nung party 38 adentsü: JP Nadda

New Delhi, Chiteni/July 17 (Agencies): Hombarnü BJP Tir JP Nadda-i, July 18 nü NDA senden nung party 38 adentsü, ta metetdaksü.



JP Nadda

Hombarnü New Delhi nung osangbenertem senden nung jembidang BJP Tir, Nadda-i linük tenzüksü aser tashi itshitsü atema National Democratic Alliance-i meranga inyakba atema tenüngsang agütsür, ta metetdaksü.

Congress-i aniba UPA teloktep aija pai, UPA teloktep nung lenir ka maliba dang masü saka telemtetbatem agütsü atema parnok dak tashi-a mali, ta ashi.

"Linük tenzüksü aser tashi itdaksütsü atema teloktepi National Democratic Alliance lir. UPA nung lenir ka maliba dang masü saka telemtetbatem agütsü atema parnok dak tashi-a mali. Iba teloktep ya pei atema dang bilemba nung ajemdaker tentetba lir aser noksa tangoktsü atema maangka anguba dang lir," ta JP Nadda-i ashi.

Paisa Ato kilonser, Narendra Modi-i inyaktetba mapatem ajanga alima ajungalen tenüngsang agütsür, ta ashi.


"Tesüiba küm 9 tsüngda

asenoki Ato kilonser Modi lenisüba tashi aita nguogo aser aikati tenüngsang agütsür. Ochimashi magizüktetba jenjang tajungba kümogo. Coronavirus azüokba nunga Ato kilonseri tatishitsü tajung yutsüogo," ta pai ashi.

"Tesüiba küm 9 nung NDA sorkari junga yimsü süogo aser onoki maneni iba atemaji inyaker. Tanü tashi nung onoki direct benefit transfer (DBT) ajanga sen 28 lakh crore tashi agütsüogo," ta pai shisem.

Sangküm Lok Sabha election agütsü lia BJP anema longjemer tokteptsü nükjidong nung Mongolbarnü Bengaluru nunga opposition party 26 senden amentsü.

Küm 5 nung India nunger cr. 13.5 sensak tia nungi anitetogo: Niti Aayog



Vice-Chairman, Suman Bery-i saya.

"India nung kanga sensakertem ajema akümba points 9.89 liasü. 2015-16 kümtem nung kanga sensakertem shilem 24.85 aliba nungi 2019-21 kümtem tashi nung shilem 14.96 dang kümogo," ta Niti Aayog report nung shia lir.

National MPI ji ajanga lenla asem- health, shisaliok aser libaliru standard kasasa asadanga liasü aser itemji sustainable development goal (SDG) 12 ajanga asadang.

India nung talisa yimsüngtem nung kanga sensak tia nung alirtem tekaraba ajema aküm- shilem 32.59 aliba nungi shilem 19.28 dang aküm aser jila/yimitem nung kanga sensak tia nung alirtem shilem 8.65 aliba nungi shilem 5.27 dang aküm.

Iba ya states aser Union Territories 36 kübok administrative district 707

nung asadanga liasü. Talisa Uttar Pradesh, Bihar, Madhya Pradesh, Odisha aser Rajasthan nung kanga sensak tia nung alirtem kanga ajema kümogo.

Niti Aayog-i, sorkari merükmeji, sorochohdang amshiba totzü, rongsenkettzüng nung züngsemba, tzü tajemtsü aser electricity jenjang ajungkettsütsü atema rangloker inyakba ajanga item lenla nung kanga tejakleni ao, ta metetdaksü.

"Multidimensional Poverty Index (MPI) lenla 12 prongla nung kanga temelenshi liasü," ta report nung shia lir.

Chiyungtsü tajung, school azüngba kümtem teimba akümba, merükmeju aser sorochohdang amshiba totzütem jenjang tajungba akümba ajanga kanga sensak tia ajemdaksüba nung kanga tongtibang shilem agia liasü, ta Niti Aayog report ajangasa metetdaksü.



New Delhi, July 17, 2023: Yamuna ayong nung tzü tali metsüngba ajanga New Delhi kübok Mayur Vihar nung süki aika tzü agi metsüngbanga aliba noksa nung angur.

New Delhi, Chiteni/July 17 (Agencies): 2015-16 aser 2019-21 kümtem (küm 5) nung India nunger crore 13.5 kanga sensak tia nungi anitetogo; talisa Uttar Pradesh, Bihar, Madhya Pradesh, Odisha aser Rajasthan state tem nung kanga sensak tia nung alirtem kanga ajema kümogo, ta Hombarnü Niti Aayog report ka ajanga metetdaksü.

'National Multidimensional Poverty Index: A progress of Review 2023' ta ajaba report ya Hombarnü Niti Aayog

GOVERNMENT OF NAGALAND DIRECTORATE OF HEALTH & FAMILY WELFARE NAGALAND :: KOHIMA

No. DHFW-5/TRG-PG/2019/

/ Dated, Kohima the 14th July, 2023.

ADVERTISEMENT

As Government Approval Vide No.HFW(A)10/31/223/499/Dated, Kohima the 14th July 2023, this is for general information to all the intending Medical Graduates who are seeking admission to MD/MS/ Diploma Courses at RIMS, Imphal under "In-Service Sponsored" and "Open" category that PG seats will be allotted to eligible candidates from the State-wise merit list of NEET-PG 2023 through physical counselling to be held at RIMS, Imphal.

A. IN-SERVICE SPONSORED CATEGORY:

Sl. No	Subject	No. of Seat
1.	MD (Anatomy)	1 (One)
2.	MD (Community Medicine)	1 (One)
3.	MD (Gen.Medicine)	1 (One)
4.	MS (Obstetries&Gynaecology)	1 (One)
5.	MD (Otorhinolaryngology)	1 (One)
6.	MD (Physiology)	1 (One)
7.	MS (radiation Oncology)	1 (One)
8.	MD (Anaesthesiology)	

B. OPEN CATEGORY: (Graduates from RIMS, Imphal only)

Sl. No	Subject	No. of Seat
1.	MD (Obstetries&Gynaecology)	1 (One)
2.	MD (Gen. Surgery)	1 (One)

Application form can be obtained from the Academic Section, RIMS, Imphal or can be downloaded from the RIMS website www.rims.edu.in

The last date for submission of application forms will be intimated on the Institute web portal.

SD/-
DR. VIBETUONUO M. SACHU
Principal Director,
Directorate of Health & Family Welfare,
Nagaland: Kohima.

RS nung Jaishankar densema lenir 10 den tetokteper mali shimogo

New Delhi, Chiteni/July 17 (Agencies): External Affairs Minister, S Jaishankar aser TMC lenir, Derek O' Brien na densema lenir 10 den tetokteper maliba ajanga Hombarnü parnok ajak Rajya Sabha nung züngsem shimogo.

Jaishankar-i Gujarat kübok Gandhinagar menden nungi tokteptsü atema nomination file süa liasü. Election Commission-i Goa, Gujarat aser West Bengal nung Rajya Sabha menden 10 atema July 24 nü election agütsü, ta sangdonga liasü.

Election Commission-i, Goa, Gujarat aser West Bengal nungi Rajya Sabha MP ter July aser August na nung kümsük abensatsü aser item menden 10 rongnung West Bengal nungi Derek O'Brien aser Gujarat

nungi S Jaishankar na indang menden densema lir, ta metetdakja liasü.

Rajya Sabha nung menden tazüng atema election nung tokteptsü asoshi tenüng agütsütsü anogo tatembangbubaji July 13 liasü, ajisüaka lenir 10 denbo tetokteper maliba ajanga shimogo, ta Hombarnü Election Commission-i metetdaksü.

2019 küm Gujarat nungi Jaishankar Rajya Sabha MP shim; pai vote 104 ngua Congress lenir, Gaurav Pandya madak takok ngua liasü.

Gujarat nungisa Union Minister ana- Amit Shah aser Smriti Irani nati Lok Sabha election nung takok anguba ajanga Rajya Sabha menden ana azüngteta liasü.



TIR YIMYIM YIMOBILEM (EDITORIAL)

DIMAPUR SANGTENNÜ, CHITENI (JULY) 18, 2023

Nagaland nung train

Yakanü Dimapur train station atongtsü anasa train lenmang ajangdanga moutet gari ka anena aliba ajanga Lalgarrh nungi Dibrugarh leni aoba train ka tera agiang lendong majuru süitetbaji ajak asoshi tia tajung ka asütsü. Iba gariji train lenmang ajanga gari süidak masü ka nung süitsü merangdang gari raksar ajanga moutet toktsüba gari ka asü südi, kechiyong gari nungji shinga mali asü. Iba tatalokba yagi Nagaland nung state government mapa nung inyakertem dang masü saka Railway nung ama center government mapa nung inyakertem dena kümdangshitsü aser pei mapa nung nendaka inyaktsü kümdangshidaktsür. Dimapur Railway station yabo India nüjiso mangudangyongi British nungertemi lapoker liasü, anungji linük nung Railway station tejentem rongnung Dimapur Railway station ya ka asütsü. Ibaji apibo Dimapur Railway station ya Guwahati Railway station den toktepa tulu aser tajung kümer alitsüba ser nung tilaba dang küma aoba angur. Atangji, Chümoukedima district kübok Shokhövi nung train station ka lapokba agi Nagaland nung train station ana kümogo, ajisüaka asen meyong train station anaji kidang kiyonger meyong train station ka shia masü kümdagi. Asenok ya yashi tashi tokolak nung khu bener tetsüng agidang jajaa aliba nisungtem asünungji, asenoki asen lima nung gari aser train junga jajaba agi asenok tajangzük anguba kangabo memetet aser mejangjar. Iba jagi asenoki gari lenmang majungyonga aremer aser gari lenmang tamajung nung jajaba agi takoksa ajubaa memeteter. Asenokbo langkushishia kor nung amener amai mener aoyonga tatongtsü ka tongra ojang, tepelashi. Aji oda, Nagaland adena oa azünger aser mapa inyakertem mesüra khenkhen luben bendangleni ralioli jajartem aikati Guwahati tashi aotsü atemabo train nung masü saka bus nung dang jajar aser ano aikati tayimtsü nung senzür. Iba jagi balaka asenoki Nagaland-i aruba aser ajanga süiba train indang kangabo mebilemer. Ajisüaka, alima nung ainlen jajaba aser khu abenba gari rongnungbo ayongayonga aser karaa jenjang dalangba agi khu tulu bener jajatsüabajibo train ya dang lir. Ano, train yabo nisung amentsüba dang nungibo khu abentsü-ang tenügdaktiba asütsü, kechiyong alima nung gari aser tayimtsü kisüng nung abenba agibo nisungtem nungdak mepiritsü. Atangji, ano khu tulu bentettsüsa rong lir saka tzüim nung rong jagi tzüküm tongtsürbo ano ali nungbo gari aser train agi abentsüsa adoker. Iba denji ano train station ka lapokba nung nisung aika mapai iteter aser item mapa adokbatemji lisopurtem asoshiibo shilem balaka shiteta toktsür. Item maongka aser nungdakji kodang asenoki metetdir, asenokia train station junga ayutsüba nung temulung agütsütsü aser train nungang ayongayonga jajanütsü. Aji oda, asenoka kodang tangar mesüka asen lima nungi ali mijang, süng aser longsang dang masü saka asenoki yanglutetba aser züsentetbatem tangaleni gari tulu sünga-sünga yoktsü tenzükdir, idangjibo train nung yoktsüsa adoktsü, anungji asen lima nung akaba Dimapur train station ya dang masü saka Shokhövi nungi Züba (Kohima) tashi atutsüba train lenmang ya yakta renemtsüla aser Tuli nung akaba train station-a tuluba küma yanglushir Mokochung atongtsü merangtsüla aser Mokochung nungi Tuensang aser Noklak atongtsü bilemstüla. Asenoki temulung magütsüba agi tangbo tamalen Covid wara marudang Dimapur nung anenba aser Dimapur nungi apusoba Nagaland Express aser BG Express train yagi Dimapur tajangdang ajanger. Ashi, talisa Nagaland Express Dimapur nungi anepdang yakta apusoba mapangbo Dimapur nungi Guwahatii lulena nungdak tur aluteta asü. Ano, Dimapur train station tuluba aser tajungba mekümtetbaji nübortemi ali atsünga agiba timtem ajanga lir. Itemji government-i tekaratiba bentettsü imlar. Aji oda, bus station dang masü saka train aser tayimtsü anendak dena nübortemi temulung agüja reprangra government-ia nübortem nüken tsüba tajungba inyaktsü, ajisüaka asenoki asen agitsüa memeteti lira, tangari asenok mezüngmeshitsü aser asenok meyong dena tanga station leni bener oa adoktsü.

OLEMSABANG

JBPAPWT-i JANGPETKONG LENMANG YANGLU Mulungnena Pelaba Osang Ka




September 6 - 23, 2022, Jangpetkong Baptist Pastors & Associate Pastor Women Telongjem-i Tzükong lenmang yangludang tangokba noksa angur.

Jangpetkong Baptist Pastors & Associate Pastors Women Telongjem (JBPAPWT)-i achaayanga September 6 - 23, 2022 tzükong lenmang yanglua liasü ta JBPAPWT ketdangpurtemi metetdaksü. Lenmang yangludang JCB 3, Dumper 3 metitemi amshiba den anogo kar nungbo Dumper 6 tashia amshia mapa inyak. Lenmang yanglutsü tenzüka mapang teka nung sen lakh 3 shi dang liasü saka kodang mapa tenzüka temulung tetenlar jenti adoka sen 14,72,960 shi bendentet. Iba nungi 1192960/- endoka yanglu aser lakh 2.8 anung. Iba sen tanünga ajak JBPAPWT nung adenba Arogo 17 nem Arogo shia Rs. 16,470/- ketdangpurtemi July 11, 2023 nü lema agütsügogo. Iba sen lemezükba jagi Arogo shiai pei telongzük nung lenmang kanga majungdak yanglushitsü JBPAPWT ajanga nungloktsüogo ta ketdangpurtemi sangdong ka ajanga metetdaksü.

"Idangji mapa tajung asoshi parnok tashi ita aküm" ta Neh 2:18 nung ashi ama ajaki pei akok tenlatepba ajanga takok angu nung teyaritem ajak dang tepelaba osang ka JBPAPWT ajanga metetdaksü. Iba lenmang yanglushiba mapa nung Tzükong nung aliba Arogotemi anir Yimten yimsüsürtem, tzükong nübur kija-kibongtem, anükapang tajungtem, JSMi anir tzükongsanger Unit balala, SHG-tem, Arogotem nung Toklang tenzükertem, item lokti balala ajaki mulungsüa sarasadem, nübu aser rongsen jenti agi yaria liasü. Ano tzükongsanger aser anükapang dak alaka Rev. Dr. Prof. Mar Pongener, Executive Secretary ABAM, Ungma Baptist Arogo aser Mangkolemba Lanur Telongjem item kija aser lokti balalai rongsen tulu tenlaba den tajungshi aser tayongzüba o agi yariba atema tepelaba tulu metetdaksü. Tetenlar aser teyaritepertem lokti aser kija kibongtem tenüng abensa-a iba osang nung magütsütetba atema sasaseta nemjemer, saka JBPAPWT-i record tejangja yua lir, yamaji Tsüngremi nenok mapa meteta lir. Anungji kija, kibong, lokti ajak dang JBPAPWT-i Tsüngrem tenüng nung mulungnena pelaba osang sangdonger. Tarutsü anogotem nunga lokti tentet balala aser nütsüng nübortem ajaki mapa tajung asoshi aser alima terenlok asoshi tangar dak dang imla-a melie, aseni akokba agi mulungsoa yaria tenlaa yariteptsü JBPAPWT ajanga ayongzüker ta JBPAPWT Tir Rev. Ayu aser tezülur Pastor Senti ajanga metetdaksü.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristan aser Muslim lenirtemi temeshi kaket ajak akhümtsübutsu ayongzük



July 16, 2023 nü Lahore nung osangbenertem senden ka nung Pakistan nung Muslim aser Khristan lenirtemi temeshi kaket pezü- Laishiba, Quran, Torah aser Zabur kakettem amer tangokba noksa nung angur.

Lahore, July 17 (Agencies):

Pakistan nung puti otsü nung tang mezüing Khristan aser Muslim yimsü lenirtemi külemi longjemer alima dang temeshi kaket ajak akhümtsübutsu ayongzük.

Amongnü (July 16, 2023) Pakistan nung Muslim aser Khristan lenirtemi temeshi kaket pezü- Laishiba, Quran, Torah aser Zabur kakettem amer osangbenertem senden ka nung jembia liasü.

Lahore nung aliba Jamia Manzoorul Islamia nung osangbenertem senden nung jembidang yimsü lenirtem jagi, ainkartemi züluba temeshi kakettem raksatsü/rongdoktsü atema nija, lokti, linük mesüra organisation kecha nem-a temelaba magütsüsüla, ta

metetdaksü.

Tawa Sweden nung nisung kati Muslim nung temeshi kaket ka rongdoktsüba tatalokba sülen Muslim nütsüing teimba aliba linüktem nung Khristantem tsübuteper.

Osangbenertem senden nungji Church of Pakistan nung Pastor Emanuel Khokhar aser Pastor Salim na densema yimsü balala nung lenirtemi jembia liasü.

Yimsü lenirtem jagisa, Sweden nung Quran kaket rongdoktsüba sülen Torah, Zabur aser Injil kakettem rongdoktsütsü temelaba agütsübjaji tejashitsüka lir, ta ashi.

European Union aser United Nations-i tangsa iba temelaba anema inyaksüla aser alima

tesem ajaklen temeshi kakettem akhümtsübutsu atema ozüing ka yanglutsüla, ta parnoki metetdaksü.

Parnokisa, Pakistan nung tamangba yimsü balala amangertem ajak tesünep nung külemi litettsü nükjidong nung Church of Pakistan, Pakistan Ulema Council aser International Interfaith Harmony Council senteper Pakistan tesem ajaklen campaign ka tenzüksü, ta metetdaksü.

Lahore nung osangbenertem senden tembanga Muslim aser Khristan lenirtemi Quran, Bible, Torah aser Psalms kakettem amer alima nung yimsü balala amangertem tsüingda taremsüktep alitsü, temeimtep alitsü aser akhümtsübutep alitsü ayongzük.

Iran nung pastor ka mile 1,000 pilar aliba jail nung puokogo

July 17, 2023: Iran nung pastor ka par kidang nungi mile 1,000 dak tema pilar aliba jail nung puokogo; pai linük security anema inyak, ta pa nem tai tongloktsüba sülen pua liasü.

Church of Iran nung pastor, Pastor Matthias (Abdulreza Ali) Haghnejad'er ki Bandar Anzali nung lir saka pa par kidang nungi meta talangka pilar Hormozgan province kübok Minab yimti nung aliba jail ka nung puokogo, ta United Kingdom nung amenoka aliba Khristan melungtet telok-Christian Solidarity Worldwide (CSW)-i metetdaksü.

Pastor Haghnejad aser kasa Arogo nung Pastor Yousef Nadarkhani nati linük security anema inyakogo, ta tai tonglokja liasü.

Iba ama ken o ka nung 2014 küm Pastor Haghnejad maitsüi chioka liasü saka yaküm January ita nunga apu. Supreme Court-i Pastor Haghnejad metenja obendang agüja liasü saka 2019 küm November 25 nü taoba mapang chief justice aser tang Iran Tir, Ebrahim Raisi-i Supreme Court obendangi agiena liasü, ta CSW-i metetdaksü.

CSW tentetsang aser Tir, Mervyn Thomas-i, Iran nung pastor temi mapang shia timtem ajuruba atema tebilemtsü akaba lemsatop.

"Judicial tsütsülen nungi Pastor ana- Haghnejad aser Nadarkhani na mapang shia reshikangshiba meteta CSW jashir aser aoksar. Iba ya Iran linükia sign süa aliba International Covenant on Civil & Political Rights kübok Arrla 14:7 alema inyakba lir," ta Thomas-i ashi.

Thomas-isa Iran ktdangsertem dang senso ajak indang tamangba yimsü temeden akhümtsübutsu aser Pastor Haghnejad densema yimsü nung ajemdaker tepuokdak puoka alirtem ajak chioktsüla, ta takhangba agütsü.

Tan ita tetenzüklen Pastor Nadarkhani aser pastor Haghnejad na anema ken o tasen benokba osang CSW-i metetdakja liasü. Police-i rongshiba nung ajemdaker apuani Khristan- Ramin Hassanpour aser Saeede Sajadpour nati pastor tem anema ken o benok, ta police dak melung meleme bilemer.

CSW-i ashiba agi, police-i Hassanpour'er kibong dang nenoki pastor tem nem tai metongloktsüra ner chirnurtem puer aotsü, ta amokmerena liasü.

Thomas-isa Iran ktdangsertem dang inyakyim shidak inyaksüla aser pastor tem anema benoka aliba ken otem agentsüla, ta takhangba agütsü.

"Arogo lenisüba atema ktdangsertemi item lenirtem amokmerener," ta pai ashi.

2016 küm May ita nung Ministry of Intelligence-i Khristantem mita aoba mapang nunga Pastor Nadarkhani pua liasü, aser pa anema temerenshi obendang tera ajemtsüyonga maneni pa anema ken o tasen benoker.

Christian support organization- Open Doors indang 2023 World Watch List report nung yamai shia lir, Iran nung house churches anema inyakyonga linük nung Arogo maneni ainer.

Iran nung talisa Islam yimsü toktsür Khristan yimsü agizükertem kanga amokmerena reshikangshir, ta Open Doors-i metetdaksü.

ANOGO ABEN TSÜNGREM DEN

OCHI METETANG

Tanurtem tatem anogo tongogo, Khrista anemer arudagi ta nenoki angashiba ama, tang joko Khrista anemer aika adokogo, aji agi tatem mapangji tongdagi ta asenoki meteter:

~I Yohan 2:18

Tiyazü sen metettsü asoshi chichiba sen aser tiyazü sen anaprongla metemdanga koba nung meputep ibaji repringtsüla, idangji dang koba shitak aser koba tiyazü aji jangjatsü. I Yohan 2 nung Yohani tiyazü tesayur nungi kümzüka alitsü atema tesayuba agütsür. Tatem anogo nung Khrista anemer (anti Christ) aika adoktsü (I Yohan 2: 18).

Khrista anemer jagi ain tashi maka sürnung kar ta jembitsü.

Aser Yisu tesayuba ajak anema apusotsü.

- * Parnok Tsüngremer tesentaktep maka
- * Parnoki Yisu Khristaji Messiah ta magizük
- * Yisu dak tamang ayuba ajak parnoki sentok. Item Khrista anemer mojinger tanela nungi kümzüksü atema Yohani tanela nung saksalemstü asoshi tajungshiba o agütsü.
- * Yisu den teti tatem makaba tesentaktep akaba.
- * Tanela Temeshi tadenba asen taküm nung alitsüba.
- * Lai O metettsüba.

SARASADEM:

Ochi metettsü aser idakji jajatsü Nai ni aniang. Amen.

Niger nung kiralongrartemi Khristantem yimtsüing nungi meindoker

July 17, 2023: Africa kübok Khristantemji kidang aliba Niger linük nung masü saka süngdong Islamic kiralongrartemi akhümbok nung ang Khristantem dang, nenoki jenoka alir. Tang Islam yimsü agizükang, tzüngluruwa mongpu lir, mesüra yimtsüing toktsür ibayongji parnok kanga oang, ta tuyur. timtemdar," ta

Niger nung Arogo lenir

kati, "Kiralongrartemi yimsüingtem semdangba mapang nung yimsüsürtem dang yimer ajak tesem ka nung ayongdenang ta tuyur, iba sülen parnoki parnok tebilemba ashir. Parnoki sorkar anemer, ta ashiba den külemi ajak dang Islam yimsü agizükang mesüra tepsettsü ta amokmerener," ta metetdaksü.

Tawa kiralongrartemi Burkina Faso den arrtsülen aliba southwest Niger kübok yim ka semdangba mapang nung Khristantem dang, "nenoki ghonda 72 tsüingda yim toktsür aotsüla, mesüra Islam yimsü agizüktsüla," ta tuyua liasü.

Open Doors Field partner kati, "Iba yimdakji nütsüing shilem 40 shi Khristantem lir. Tang tashi nung Khristan kibong 69-i yim toktsür anasa aliba jila ka nung jenokogo. Ajisüaka jila nungji

meindoker kidang masü saka süngdong Islamic kiralongrartemi akhümbok nung ang jenoka alir. Tang tzüngluruwa mongpu lir, ibayongji parnok kanga timtemdar," ta metetdaksü.

Niger linük arrtsülen nisung melamela senzüteter, ibayongji Nigeria densema kidanger linüktem nung rara ajanga Niger linük-a kongshir, talisa Khristantem tamajungtiba kongshir.

2021 küm tashi nung alima nung kiralongra agi tamajungtiba kongshiba linük 10 rongnung Niger linük densema lir.

Niger nung aliba yim ka nungbo Khristantem Tenla kidang tekülem sentong agidang kongki balala mamshidaktsür. Muslim tsürtem tekolak meibangba sü 'hijabs' Khristan tsürtem dang agitsü tuyur aser Khristan teburtem bangsemo wadaktsür.

Niger nung Islamic telok balala, talisa Islamic State Greater Sahara (ISGS) amenokba sülen nungi tesem kar nungbo Khristantem tekülem sentong agiba meshimeshia nokdangogo.

AO OSHI ANGAZÜKDAK: TANÜ ANGAZÜKTSÜBA OJANG



Repra

(v) alu arutsü mapang tesüsabuba ai reptena alu inyakba (last weeding before harvest)

* Ozü lu nung tanü **repra** mapa ajak temer adok.

Reprang

(v) angutsü atema aji (look at)

* Tanep ni **repranga** lia anü adok.

OLONG PAITEP # 6579

1		2				3		4		5
				6						
		7		8						
9						10			11	12
				13		14	15			
16						17			18	
				19		20				
21		22								23
24										

TIPIEN

1. Saku - (4)
6. Songjen - (7)
7. Mali/Tazung - (4)
9. Tasen apok - (6)
11. Songtem - (3)
13. Ata liasü - (5)
16. Tzunglu den külemi tsüker - (3)
17. Aso tila - (6)
20. Tashi maküm - (4)
24. Tenüng kasa jatepba - (7)
25. Ki yangluba oset - (4)

LANGTSÜNGLEN

1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. _ _ _ tatsü - (3)
12. Tebur kidong aser zünga kasa tsüngda jatepba - (4)
14. Pela agizükba lapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6577 TELANGZÜBA

TIPIEN :

2. Pongsen, 5. Lepko, 7. Omen,
8. Maangka, 10. Yangkhu,
12. Senpong, 14. Angu,
15. Raksa, 16. Arameso,

LANGTSÜNGLEN :

1. Alimang, 2. Pongen,
3. Samaru, 4. Nün, 6. Pio,
9. Nüngdak, 10. Yongya,
11. Kongro, 13. Ora, 14. Ata.

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Tepela
Tasoba Anogo**



1. Tenüng :
2. Tasoba anogo:
3. Küm : 4. Class :
5. School :
6. Talidak :
7. Salem osang :

Happy Birthday

TENÜNG : MAONGKAR MEYI JAMIR
Tasoba anogo : 18/07/2020
Talidak : Imkonglenden, Dimapur
Jabaso küm 3 tashi arishi moatsüba asoshi Tsüngrem tenüng asanger ano maneni jabaso anema aliba den arishi talang moaja Pa tesünep nung tokjang ta onok sarasadem.
~ Temeim Oja, Oba, otsü, obou aser kinungertem.



Assam CM anema FIR 2 benokogo

Guwahati, July 17, 2023

(Agencies): Assam chief minister Himanta Biswa Sarma-i Miya nunger anema jembiba atema Assam nungi Rajya Sabha MP Ajit Kumar Bhuyan-i FIR ka benokogo.

"Assam CM Himanta Biswa Sarma-i Upper Assam nung alirtem Guwahati-i arutsü aser iba ajanga Guwahati nungi Mia nunger agientsü tayongzükba agütsü. Iba olen jembiba ya social media nung lir. Iba ama onük ya state nung aliba lokti balala tsüngda tesempatep adokdaksütsü atema lir aser linük longjemtsüba anema lir" ta Bhuyan-i benokba FIR nung shia lir.

"Supreme Court-i State aser Union Territory ajak dang ruling party lennirtemi ken o mebenokaka kin ka anema tesempatep adoktsü indang jembiba ken o ajak police tsüngdang benoktsü shiogo. Iba tangatetba nung ni Chief Minister-i jembiba anema FIR benoker" ta paisa ashi.

July 13 nü osangbener den jembidang Assam chief minister Himanta Biswa Sarma-i 'Miya' (Bengali oshi jembiba Assamese Muslims) indang ashishitep onük ka jembia liasü.

Assam ya 'Miya' nunger medenra meperir ta All India United Democratic Front (AIUDF) president aser MP Badruddin Ajmal-i olen ka jembiba sülen CM Sarma-i iba onük jembia liasü.

July 17 nü Asom Sankhayalaghu Sangram Parishad-ia Nagaon Sadar police station nung Assam Chief Minister Dr Himanta Biswa Sarma anema FIR ka benokogo.

ChM Sarma-i 'Miya Assamese' olen dena ashishitep aketba onük jembiba atema ASSP-i FIR benok.

Chief Minister Sarma aser Badruddin Ajmal tsüngda tesentaktep lir aser Dr Sarma ajanga jembiba onük ashishiteper ta parnoki ashi.

Miya nunger meindoktsü amokmerenra onoki mass movement ka tenzüksü, ta Asom Sankhayalaghu Sangram Parishad-isa metetdaksü.

Chief Minister-i par tanurtem tenüng nung company aika lapoka lir aser par jabaso kati Minority Sangharsh Samiti nungi temelaba agir public footpaths nung shishilembar ta parnokisa ashi.

MOLUNGNEN O KA

Onoki teti meima aliba **Late Temjennochet**, Changki, adianu aser kinungertemi Pa ajungben lendong tulu ajurua July 4th 2023 nikongtsütsü,iba akümüli wadang tembangdang, onok taoksa nung teimla samar mesungjemteti shisa bulu khuret tulu den rongjenseta alidang, ana aser talang nungi nenok sarasadem, shisatsü, rongsen aser tsüngdong arua nüken belem jenti arema, onok den asüko lemsatapa yariba ajanga anisungzük aser taochi nguogo. Pa onok den mali kümogo, saka, kiyongertem, tembartem aser adianutemi onok metoktsütsü ta onoki metetogo aser temulong alemem. Anungji onok ajak iba nungji anisungzük angur. Nenok mapa tajung aser aria bilemstüba sarasademji tesüngmangtsü ka lir. Asen Tsüngrem nem tenüngsang tulu aguja, nenok kija, kibong, Arogo, pai tenzuka aruba Excise Department aser lokti tentet balala ajak dang ozü asüko mapang, yimya balala agi yaritepa aruba asoshi kangasa pelara ni ta iba osang kaket ajanga lemsateper.



Aso:01-12-1968
Asü: 04-07-2023

Asen Kibuba Yisu Khrista taochi aser tesünep koba agi ajak ajangdang, iba jagi nenok dena teti liangma ta ozü sarasadem aser onok koma temoatsü angu nenoka yamaji moajangma. Amen Kanga dang pelar,

-Temeim Late Temjennochet kinungertem



OFFICE OF THE
DIMAPUR MOLUNGKIMONG SENSO TELONGJEM
Dimapur - 797112 : Nagaland

TENÜNGSANG AGÜTSÜR

DMST mendenti ajanga lenla balala nung asen züngsem temi takok tajung angurtem nem tenüngsang agütsür.

1. **Mrs. Rongsenkala Lemtur**, D/o. Mr. Imtinungshi Lemtur & Mrs. Imonenla Imsomg, lai NPSC ajanga agiba Common Educational Services Examination (CESE) nung Post Graduate Teacher (Hindi) ngutetba.
2. **Dr. T. Arenla Ozukum**, D/o. Mr. Temjensoba Ozukum & Mrs. Yudangsenla, lai English and Foreign Language University, Hyderabad, nungi la thesis "Young Adult Literature in the Indian Classroom: A Critique of the Mainstream Pedagogic Practice" nung Ph.D (English Literature) ngutetba.
3. **Mrs. R. Yangertemla Ao**, W/o. Mr. Imnatoshi Longchar, lai Chief Vety. Office, Dimapur nung Junior Farm Manager (Class -II Gazetted) jenjang tongtetba.

Nenoki meranga inyakba nung Tsüngrem teyari dena takok anguba asoshi nenok nem tenüngsang agütsür, aser tarutsü anogotem nunga maneni meranga inyaka nüburtem tenzüksü ajungshir.

(T. Nungshi Tzudir)
Tir

(S. Maong Longchar)
Tongti Zülur

GOVERNMENT OF NAGALAND DIRECTORATE OF HEALTH & FAMILY WELFARE NAGALAND:: KOHIMA.

NO.DHFW-5/D.PHARM/PART-II/2014/

DATED, KOHIMA

THJULY' 2023

ADVERTISEMENT

As per Government Approval Vide Order No.HFW(A)/MISC-12/14/2012/490/Dated, Kohima the 13th July, 2023 invites interested local candidates to undergo Diploma in Pharmacy course for the academic session 2023 at RIPSAT, Agartala. The last date for submission of application form is 21st July, 2023. Short listing criteria and other details are as follows:

1. 5 (Five) Nos. of Seats available for D.Pharm at RIPSAT, Agartala.
2. Applicant should have cleared HSSLC (10+2) in Science Stream with minimum 45% in case of SC/ST candidates (Physics, Chemistry, Biology, Mathematics).
3. All relevant documents: HSLC & HSSLC Admit card, Mark sheet, Certificates, SC/ST Certificates, Indigenous Certificate, one recent Passport size photo, should be enclosed along with the application with complete address and contact no.
4. The maximum age limit is 25 years on or before 1st June' 2023.
5. Application Form can be downloaded from the Department website: nagahealth.nagaland.gov.in
6. Last date of submission of Application forms will be on 21st July, 2023. Duly filled in application in hard copy along with requisite supporting documents should be submitted in Room No.210 (Training Section) along with Rs.200/- as processing fee.
7. Selection will be done based on Academic Merit Marks. SD/-

DR. VIBITUONUO M. SACHU

Principal Director,
Directorate of Health & Family Welfare,
Nagaland: Kohima.

South Korea tzümetzung nung asür nisung 40 jungogo



Seoul, Chiteni/July 17 (Agencies): South Korea nung hopta tatemlen tzunglu kanga sashia aruba ajanga linük tesem balala nung tzümetzung adoka anentsüh aluba lendong nung asür nisung 40 jungogo.

Iba lendong ya ajanga Tir Yoon Suk Yeol-i tzu-mopung melenba ajanga linüki tzungsang tamajung azüoktsü asoshi lenmang bushir.

Tunnel ka nung tzümetzung agi gari tem temai madokteti mubanga sülen nisung 13 asüba ajanga linük nung taoksa tulu lir.

Yangji nisung kwi asüar tang tashi mejangjateti lir.

Ajisüaka Hombarnüa Cheongju yimti nung metre 685 (feet 2,247) talang tunnel nungi ketdangsür temi tzu mesepdoktsü meranga liasü aser yangji alirtem agitettsü asoshi tzuishir yoker.

Anasa aliba ayong nungi Honibarnü tzu muzüka aluba iba tunnel ya mubang, aser iba mapang bus ka densema gari 15 shi temai madokteti akum.

Tang tashinung nisung toku takum kumzuka lir. Kasa mapang samar alir kinungertem yangji aliba mozüki ka nung osang angashitsü yongyasetata liasü.

"Ni teimla maka saka ni yutsür moteter. Tzu temokong nung kü jabaso koma alitsü ta bilemdang kü molung ayanger," ta iba tunnel nung samar aliba nisung ka indang tsürabor kati ashi.

Lenmang ka ajanga senzüsü asoshi ali telung leni lenmang tua lur senzüa alidak tzümetzung adokba indang bushisüngdang asütsü, ta police-i shiogo.

Ano tenem agi sünga aliba North Gyeonhsang region nung

anentsüh aluba nisung aliba ki ajunga nungzükter aoba lendong nung nisung 19 shi süogo.

North Chungcheong nung aliba Goesan Dam nungi tzu tali ayimba sülen Honibarnep nisung 6,400 shi pei talidak nungi anizükter ao.

Iba tzünokdang tsünglanglen aliba yimtsung aser item den sendaktepba lenmang tzu agi mubanga yangji alirtem pei kidang nungi mainshiteti akum.

South Korea nung meyi tzunglu tesashitiba aruba rongnung tang ya ka lir, aser taoba hopta tzunglu kanga sashia aruba ajanga linük tesem ajungalen tzümetzung, anentsüh aser power cuts ajurua lir.

Hombarnü Tir Yoon Suk Yeol-i iba ama tzu-mopung dak sendakba lendong nung linüki telangzüba agütsüba yimya ajak melenshitsü, ta nangzuka liasü.

Tzümetzung adoktsüba tesemtem nung junga anepalu masüba ajanga nisung aika asü, ta pai Hombarnü North Gyeongsang province semdangba mapang ashi.

South Korea nung Honibarnü kisung nunga tzunglu 300mm (11.8in) arua liasü. Iba linük nungya küm nung tzunglu 1,000mm (39.4in) nungi 1,800mm (70.9in) tashi arur, ta Korean Meteorological Association ajanga ashir.

Russia-i jangotzü belentsü atema tenangzüktepba yanglubanungi atsüngin

Moscow, Chiteni/July 17 (Agencies): Kremlin-i ashiba agi, Black Sea ajanga Ukraine nungi alima nung ayawara agi tonger aliba tesemtemi jangotsü yoktsü atema tenangzüktepba yanglur aliba nung Russia-i shilem magitsü.

United Nations aser Turkey nati achaayanga taoba küm July ita Ukraine aser Russia na den iba tenangzüktepba yanglua liasü, kong Russia nunger chiyongtsü aser fertiliser belentsü asoshia tenangzüktepba balaka yanglu, ajisüaka Russia-i ashiba agi iba tenangzüktepba ya benoka inyaksangshi masür.

Black Sea deal ya aiben atsülanga aruogo aser Hombarnü nikongtsütsü tembangtsü liasü, saka Russia-i iba tenangzüktepba atsülangtsü asoshi memulungba kuli agüja atsünginogo.

Iba tenangzüktepba kübok Ukraine-i menti aser wheat metric tonne million 32 tashi linük balalai yokogo aser tatembangbuba rong Ukraine nungi Deobarnü apusoago.

"Black Sea agreements ya tanü nungi inyaksangshi masütsü," ta Peskov-i Hombarnü osangbenertem dang ashi.

"Tia maka Russia dak sendakba nung Black Sea agreements tang tashi mebenoki lir anungji iba tenangzüktepba ya benoka inyaksangshi masütsü," ta pai ashiba den tenangzüktepba kübok Russia dak sedaka aliba shilem kodang ataloktsüdir idangji parnok iba

tenangzüktepba dangi meyipa arutsü.

Russia-i Turkey, Ukraine aser UN dang iba tenangzüktepba matsülangtsü ta metetdaksüogo, ta Russian foreign ministry otongdar Maria Zakharova-i ashi.

Crimean Peninsula den sendaktepba apu ka Ukraine-i makogo ta Russia-i ashiba sülen ghonda ishika dang lir jangotsü belentsü atema tenangzüktepba yanglur aliba nungi Russia atsünginba sangdonga liasü.

Peskov-i ashiba agi, iba tenangzüktepba meyanglushitsü atema telemtetba agiba ya manger mesangwa tsüngda Ukraine-i parnok amakba dak kecha sendaka mali. Paisa, iba apu raksatsüba ya kiralongrar mapa ka ta ashiba den Ukraine dak tai tongloktüsügo.

Ukraine aser Russia na ya alima nung agricultural producers tulutiba ana lir aser parnok ya wheat, barley, maize, rapeseed, rapeseed totzü, sunflower tejang aser sunflower totzü shishilembadak tongtibang shilem agirtem lir.

Russia-i Taoba küm February ita Ukraine amak tenzükba sülen chiyongtsü nung jenjang aika aküm aser iba ajanga alima ajunga nung chiyongtsü dak sendakba nung timtem adoka liasü.

Middle East aser Africa kübok linüktem nung chiyongtsü jenjang tasak akümba ajanga nüburtem rongsenketzung nung tetsükdaksü tulu adok aser nisung million aika sensaktia-i idaktsü.

Black Sea deal kübok Rongtem Ukraine indang rongnendaki aiba aser atokba mapang mamaktsü nangzüktepba liasü. Ano tanga tenangzüktepba ka nung Russia nunger chiyongtsü aser fertiliser tema belentsü atema nangzüktepba liasü.

Ukraine amakba ajanga anüolen aliba linüktemi Russia nem tenokdangba agütsüba ajanga jangotsü belenshiba nung tetsükdaksü adokba dang masü saka payments, logistics aser insurance nung tenokdangba agütsüba ajanga tetsükdaksü adokogo, ta Russia-i ashi.

Russia-i akhangba tongtibang onok rongnung Russian Agricultural Bank (Rosselkhozbank) SWIFT international payments system nung tanaben sendaktepshitsüsü asoshi liasü. Ukraine amakba atema European Union-i 2022 küm June ita iba bank ya SWIFT nungi agina liasü.

Tir Vladimir Putin-i taoba hopta ashiba agi, Russia dak sendakba tenangzüktepba benoka inyaksangshi masür, anungji Russia-i shilem magitsü asoshi bilemdar aser tenangzüktepba kübok tinyaktsütem ajak atalokba sülen maneni meyipa arutsü.

Russia-i Black Sea deal atsülangtsü atema asemben tashi mulunga agizükogo, ajisüaka taoba küm October ita Crimea nung parnok rongtem amakba sülen khen atema shilem magi atatsü telemtetba agina liasü.



**OFFICE OF THE
DIMAPUR MANGMETONGTSÜR TELONGJEM**
Dimapur - 797112, Nagaland.

TENÜNGSANG AGÜTSÜR

Mangmetongtsür Telongjem Dimapur-i **Sp. Sangto Longchar**, Lt. I. Moa Longchar aser Wt. Sentila-er japaso pai NSSB exam 2022 nung LDA Cum-Computer Assistant (Directorate) Water Resource Department nung takok tulu anguba tenüngsang aser tetushi agütsür.

Tsüngrem-i ne taküm aser wadang ajak nung maneni moajangma.

<p>Sd/- Dr. Sentila Tir. MTD.</p>	<p>Sd/- Wt. Merenla Jamir Tongti Zülur. MTD.</p>
--	---

Dibuia Compound Baptist Arogo
P.O. Mangkolemba, Mokokchung

TENÜNGSANG AGÜTSÜR



I. Shijung Walling'er jala aser Discipleship Bible College (DBC), Dimapur nung Associate Professor, **Dr. Narola Walling**-i Program for Theology and Culture in Asia (PTCA) aser DBC kübok "Evolving an Inclusive Ministerial Program for Person with Disabilities in DABA (Dimapur Ao Baptist Arogo)" thesis nung Doctor of Ministry jenjang ngutetba asoshi Arogoi tenüngsang agütsür.

Ni ya sarasademer: nenok temeim tali tali rendakjang, temetetba aser teratetba nung tali moshia kumjang. Filipi 1:9

<p>Sd/- Senti Pastor Dibuia Compound B/C</p>	<p>SD/- T. Tinu Walling Secretary</p>
---	--

TENÜNGSANG AGÜTSÜR



Asangma Shisashir Telongjem ajanga:

- Kr. MOARENLA JAMIR** subject topper (Rank 1) BA Sociology Honours Modern College, Piphema D/o Lt. Er. Wb. Tamsünba Jamir aser Wt. Chubasenla.
- Kr. IMTIMONGLA** NPSC PGT History. D/o Wb. T. Mar Imsong aser Wt. Imnatula Langu.
- Sp. IMLISANEN**, Physical Education Teacher, NSSB. S/o Lt. Wb. L. Imsü Imsong aser Wt. K. Lipokla Jamir.
- Sp. KORASÜNEP**, Drawing Teacher, NSSB. S/o Wb. A. Kika Lenda aser Wt. Maongsangla.

Takok tajung den khonang nüngsang bener arutsüba asoshi nenok ajak nem tenüngsang agütsür. Asen teyanglur Tsüngremi nenok taküm aser wadang ajak nung maneni takokba moajangma ta sarasademtsür.

<p>Sd/- Tir Sp. MOALONG LEMTUR</p>	<p>Sd/- Tongti Zülur Kr. WATISANGLA LONGKUMER</p>
---	--

**Office of the
LION'S CLUB LONGSA**

TENÜNGSANG AGÜTSÜR

Wb. Limangangshi aser Wt. Nungsangnungla na jabaso **Wb. Lanutoshi Jamir**-i 'National Level Open Global Poetry & Creative Writing Competition 2023' nung Top 4 jenjang nungteta takok tulu asen club nem konang bener arutsüba asoshi tenüngsang agütsür.

Asen taküm alisang Tsüngremi ne sempet, wadang aser ner kibong maneni moajangma.

<p>Sd/- Nungsangtemshi President</p>	<p>Sd/- Temsutoshi Secretary</p>
---	---

1buba Inter-College Champions Trophy osang



Dimapur, Chiteni/July 17 (TYO): Nagaland Cricket Association tawabangka kübok Dimapur District Cricket Association aser Chumoukedima Cricket Association nati ayongzüka 1buba Inter-College Champions Trophy 2023 July 17 nü nungi tenzüka asayadaki. Iba asayamung ya Nagaland Cricket stadium aser Sovima Cricket ground nung asayadaki. July 17 nü Nagaland Cricket stadium nung mezüngbuba asaya Dimapur Govt College aser Unity College na asaya liasü. Iba asaya ya Dimapur Govt. College-i wicket 6 agi koka liasü.

Mezüng fielding amenba sülen DGC-i Unity College nem over 15 nung asayar 9 out ser run 78 dang yangludaktsü. Unity atema Pankaj Das-i run 18, MdShakir Ahmed-i 13 aser Sumit Basak-i 13 yanglua liasü. DGC atema Saurav-i wicket 4 aser Chandemo Odyuo o Avoy Dey nati wicket anana agia liasü.

Tanabuba innings nung DGC-i asaya junga metenzüket aser opener ka mezüngbuba ball nung out asü aser tanabuba batsmen ball tasembuba nung out süatok. Ajisüaka parnok i wicket 4 anunga lia over 11.1 nung asaya kokatok. DGC

atema Alok Sharma-i run 56 yanglua liasü.

Iba asaya atema DGC nungi Alok Sharma nem Man of the Match naroküm agütsü.

Nagaland Cricket stadium nung tanabuba asaya nung Salt Christian College puri Tetso College pur nem over 16.5 nung run 56 dang yangludakja liasü. Tetso nungi batsmen tem rongnungi kati danga run ter adena meyanglutet. Salt Christian College atema Raj Babu Prasad-i wicket 4 aser Dip Borah aser Sahail nati wicket anana agi.

Run arishiba mapang Salt Christian College puri target ya 10.1 over nung menepa liasü. Parnok rongnungi Dip Borah-i out mesüi run 25 aser Raj Babu Prasad-ia out mesüi run 15 yanglu. Tetso atema Apong Konyak-i wicket 2 agi. Iba asaya atema Man of the Match naroküm Raj Babu Prasad nem agütsü.

Maneni Sovima Cricket Ground nung mezüngbuba asaya JN Aier College aser St. Joseph University na asaya saka kasasa nung tembang.

JN Aier College-i mezüng batting amentsü shim saka tzünglu aruba ajanga over ajemer asaya-a over 25 melen 15 dang asaya aser parnok

wicket 8 out ser run 112 yanglu. Parnok rongnungi Vitoka-i run 32 aser Robin-i run 28 yanglua liasü. St. Joseph University atema Kitiki A Zhimo-i wicket ana agi.

Asaya tanabuba shilem nung St Joseph University puri kanga merangdanga asaya ajisüaka parnok i over 15 nung asayar ajak out ser run 112 dang yangluteta asaya kasasa nung tembang. Parnok rongnungi Kabel-i run 22 aser Sulanthung o Kitiki natia run 20 aser 19 yanglua liasü. JN Aier College atema Vitoka Aye-i wicket 3 agi aser pa nem Man of the match naroküm agüja liasü.

Tanabuba asaya Public College of Commerce aser NIT Nagaland na asaya ajisüaka tzünglu aruba ajanga innings ka dang asayar masayateti liasü. Team anaprongla nem point kaka agütsüogo.

July 18 nü asaya:

Nagaland Cricket Stadium:

8:30 AM: Public College Dimapur vs J.N Aier College
1:00 PM: NIT Nagaland vs St. Joseph University

Sovima Cricket Ground:

8:30 AM: Dimapur Government College vs Tetso College
1:00 PM: Unity College vs Salt Christian College.

36buba Kings Cup World Sepaktakraw Championship nung Naga tsürtemi medal 6 angu



Diampur, Chiteni/July 17 (TYO): Thailand kübok Nakhon Ratchasima Province nung July 8 nungi 16 tashi asayaba 36buba Kings Cup World Sepaktakraw Championship nung India team nungi Naga tsür parnok pongui shilem agi aser medal 6

ngutetogo.

Parnok rongnungi Jwensinle Kesen silver ka aser bronze medal ka, Menenu Tsükrü-i silver medal ka, Seyiekhrieno Tapa-i bronze medal ka, Sezovelu Dozo-i bronze ka aser Akumtila-ia bronze medal ka nunga liasü.

Kasa mapang nung parnok ajak taruba 19th Asian Games China 2023 atema renemshitsü asoshi Ministry of Youth Affairs and Sports aser Sports Authority of India-i teyari agüja Takraw Foundation of Thailand, Bangkok nung anogo 45 training agitsü.

Taekwondo Catch Them Young asayamung ayonger

Dimapur, Chiteni/July 17 (TYO): Department of Youth Resources and Sports-i ayongzüka, Taekwondo asaya atema State Level U-14 Catch Them Young Tournament July 19 nungi 22 tashi Indira Gandhi Stadium, Kohima nung asayatsü.

Asayamung lapokba aser

shibangba sentong nung S. Keoshu Yimkhiung, Advisor for Youth Resources & Sports, Government of Nagaland, aser R. Ramakrishnan, IAS Development Commissioner & Principal Secretary Law & Justice, Government of Nagaland na alakteta jaoker asütsü.

1st P. Vizheto Motorsports Sprint cum Autocross asayaogo



Chumoukedima, Chiteni/July 17 (TYO): 1buba P. Vizheto Motorsports Sprint cum Autocross 2023, AGRICULTURE EXPO, Chumoukedima, Nagaland nung July 13 nungi 15 tashi asayar takok nung tembangogo. Iba asayamung nung Nagaland aser Northeast India nungi gari anir 70 dak temai shilem agia liasü.

Tetoktepba nung category balala lemsar liasü aser iba ajanga gari anirtem nem parnok sempet sayutsü atema maongka agütsüba den tetokteper tajungtem den tokteptsü asoshi maongka agüja liasü.

Tetoktepba nung takok angurtem yamai alitsü:

ROOKIE Category:
Winner: Thezietuolie Kire 1st runner-up: Subroto Bhowmick 2nd runner-up: Avibu Khro 3rd Runner-up: Tongpok Pongen 4th Runner-up: Chumdemo Yanthan

OPEN Category: Winner: Tomito V Shohe (Street Kings Club) 1st runner-up: Babit Lyndoh (Street Kings Club) 2nd runner-up: Jaki Trang 3rd Runner-up: Alem I Jamir (R.D Club) 4th Runner-up: Ana Solo (K.A.M.C)

BELOW 1.1cc Category:
Winner: Chumdemo Yanthan 1st runner-up: Tomito V Shohe (Street Kings Club) 2nd runner-up: Ana Solo (K.A.M.C)

SUV Category: Winner: Kamlesh Das 1st runner-up: Andy Mawrie 2nd runner-up: Anthony Lyndoh

LADIES Category: Winner: Miss Asibeiu Chupuo (R.D

Club) 1st runner-up: Miss Becky Sumi (P.V.M.S.C) 2nd runner-up: Mrs. Melissa Soanes.

Kasa mapang nung Racing Dynamics Club (RD) nem Lt. Rajesh Sharma Memorial Trophy for Best Discipline Club naroküm agüja liasü.

Street Kings Club Dimapur nungi Atoka Zhimo nem Most Promising Driver naroküm aser Lt. Rajesh Sharma Memorial Trophy agüja liasü.

Iba sentong ya Aboli T. Wotsa lenisüba nung agi aser tetoktepba tepeyong nürurtem nema shilem agidakja jangradema mungogo. Tetoktepba balala nung takok angurtem nem sempet agütsüba sentong ya July 15 nü nikongtsütsü agi, kong tongtibang nisung aikati shilem agia liasü.

Iba sentong nung DDADU tir Tito Yephthomi tetushi tejaoker liasü aser State Mahila Secretary, BJP Nagaland Ruth Pochury alakteta jaoker liasü.

Maneni sentong nung PVMSC tir Atoka Awomi-i, club tem, tetoktepba nung shilem agirtem aser terprangertem ajak dang kanga pelaba lemsatet. 1buba P. Vizheto Motorsports Sprint cum Autocross 2023 ajanga Nagaland aser Northeast nung motorsports jangrartem tejangraba aser sempet sayaogo.

Kasa mapang nung tetoktepba ayongertemi Street Kings Club Dimapur, Dimapur MOTORSPORTS CLUB, Nagaland Adventure Club aser Theja Kire dang mejeta pelaba lemsateta liasü.

BILEMDANGANG

"Shirnoki pei mulung memelenshiteter parnok i kecha memelenshitetsü."